

PERANAN AKAL DALAM MENGENALI ALLAH S.W.T.: KAJIAN TERHADAP SURAH AL-NAHL

ABDUL MUKTI BIN BAHARUDIN

abdulmukti@kuis.edu.my

Kolej Universiti Islam Antarabangsa Selangor (KUIS), Bangi Selangor

ABSTRAK

Allah s.w.t. telah menjelaskan di dalam al-Quran bahawa manusia adalah sebaik-baik makhluk yang diciptakanNya. Keistimewaan yang mereka miliki berbanding makhluk-makhluk lain ialah akal. Anugerah akal ini menjadikan manusia makhluk yang mukalaf. Oleh itu perkara utama yang diwajibkan kepada manusia ialah mengenal penciptanya, iaitu Allah s.w.t. Lantaran itu, terdapat banyak ayat-ayat al-Quran yang menyarankan manusia menggunakan akal mereka untuk mengenali Allah s.w.t. serta menafikan sekutu bagiNya. Kajian ini akan menganalisis surah al-Nahl dengan memfokuskan ayat-ayat yang menyarankan kepada manusia agar menggunakan akal dalam mentauhidkan Allah s.w.t. Metodologi yang digunakan dalam kajian ini ialah berbentuk kualitatif. Hasil kajian mendapati bahawa akal memainkan peranan yang amat penting dalam mengenali Allah s.w.t. Namun ia perlulah dipandu oleh al-Quran dan al-Sunnah agar tidak tersasar daripada jalan yang sebenar.

Kata kunci: akal, al-Nahl, akidah dan Allah

1.0 PENGENALAN

Akal merupakan anugerah Allah s.w.t. yang amat istimewa kepada makhluk yang bernama manusia. Dengannya manusia berbeza daripada makhluk-makhluk yang lain. Selain bentuk fizikal yang sememangnya berbeza, akal yang dianugerahkan oleh Allah s.w.t. menjadikan manusia mampu menguasai makhluk-makhluk lain, meneroka alam yang amat luas ini, mentadbir bumi dengan teratur, bahkan yang paling utama, mampu mengenal *khaliknya*.

Di dalam Islam, akal mempunyai pelbagai fungsi dan peranan. Salah satu daripadanya ialah merenung, memikirkan dan mentadabbur alam. Ini kerana ia merupakan peringkat pertama sebelum akal yang normal akan mengorak langkah ke peringkat yang kedua iaitu memikirkan siapa yang menciptanya. Firman Allah s.w.t.:

إِنَّ فِي خَلْقِ السَّمَاوَاتِ وَالْأَرْضِ وَاخْتِلَافِ اللَّيْلِ وَالنَّهَارِ لآيَاتٍ لِّأُولِي الْأَلْبَابِ {190} الَّذِينَ
يَذْكُرُونَ اللَّهَ قِيَامًا وَقُعُودًا وَعَلَىٰ جُنُوبِهِمْ وَيَتَفَكَّرُونَ فِي خَلْقِ السَّمَاوَاتِ وَالْأَرْضِ رَبَّنَا مَا
خَلَقْتَ هَذَا بَاطِلًا سُبْحَانَكَ فَقِنَا عَذَابَ النَّارِ {191}

Maksudnya:

Sesungguhnya dalam penciptaan langit dan bumi, dan silih bergantinya malam dan siang terdapat tanda-tanda bagi orang-orang yang berakal, yaitu orang-orang yang mengingat Allah sambil berdiri atau duduk atau dalam keadaan berbaring dan mereka memikirkan tentang penciptaan langit dan bumi (seraya berkata): “Ya Tuhan kami, tidaklah Engkau menciptakan ini dengan sia-sia. Maha suci Engkau. Peliharalah kami daripada azab neraka.

(Ali Imran (3): 190-191)

Seruan menggunakan akal dan berfikir amat banyak dinyatakan oleh Allah s.w.t. di dalam al-Quran. Kebiasaannya Allah s.w.t. akan menyatakan berkenaan kejadian-kejadian ciptaannya serta didatangkan misalan-misalan, lalu meminta manusia menggunakan akal mereka untuk memikirkannya dan menilai dengan sebaiknya. Dan proses pemikiran yang berlaku itu pasti akan menatijahkan satu solusi dan kesimpulan yang amat menarik.

Oleh kerana surah al-Nahl ini disepakati oleh kebanyakan ulama tafsir bahawa ia merupakan surah yang paling banyak membicarakan tentang nikmat-nikmat Allah s.w.t., kajian akan memfokuskan kepada surah ini dan memetik beberapa contoh daripadanya sebagai bukti betapa pentingnya fungsi akal dalam mengenal Allah s.w.t.

2.0 DEFINISI AKAL

Di dalam bahasa Arab, kata al-‘aql (‘akala – ya’kulu – ‘aklan) mempunyai beberapa variasi makna sesuai dengan bentuk kemasukan imbuhan. ‘Akal antara lain berarti mencegah (al-hijr) dan bijaksana (alnuhâ). Sedangkan dalam bentuknya yang lain (mengikuti bentuk ifti‘âl), ia bermakna mencegah, melarang, merintang, menghalangi, dan menahan (al-habs); ia juga bermakna denda (al-diyah), tuan (al-sayyid), yang paling dermawan (akrama), dan yang terhormat (mu‘azzim) (Muhammad, 1997).

Selain itu ia juga memberi maksud memahami dan mengetahui akan hakikat sesuatu (al-Mu’jam al-‘Araby al-Asasi).

Manakala menurut Kamus Dewan, akal bermaksud budi, fikiran, daya upaya dan ikhtiar (Kamus Dewan, 2007).

Di dalam bahasa Inggeris pula, ia diterjemahkan menjadi *reason, intelligence, intellect, understanding, dan intellectual powers*.

Definisi akal menurut ulama:

Menurut Said Hawwa: kata *al-aql* mempunyai banyak makna yang berbeza. Tapi secara umumnya ia mempunyai dua makna. Pertamanya, kata *al-aql* sering digunakan dan diertikan sebagai mengetahui tentang hakikat sesuatu. Keduanya, kata *al-aql* digunakan dengan pengertian pengetahuan yang mampu mengetahui berbagai ilmu (Said Hawwa, 2010). Dan beliau mengaitkan kedua-dua makna ini dengan *al-qalb*.

Dan ada antaranya mentakrifkan aqal sebagai asas asal dan konsep utama yang menyebabkan manusia itu dipertanggungjawabkan dengan taklif serta syarat seseorang itu sempurna (Abd Latif dan Rosmawati, 1997).

3.0 PENGENALAN SURAH AL-NAHL

Surah al-Nahl atau surah Lebah mengandungi 128 ayat. Dari segi susunannya di dalam al-Quran, ia merupakan surah yang ke 16, iaitu selepas surah al-Hijr dan sebelum surah al-Isra'. Namun dari segi tertib penurunannya, ia diturunkan selepas surah al-Anbiya' dan sebelum surah al-Sajadah, iaitu surah yang ke 72 diturunkan. Jumhur ulama mengkategorikan surah ini sebagai surah Makkiyyah. Dan ada yang mengatakan, kecuali tiga ayat yang diturunkan di Madinah. Menurut Qatadah dan Jabir bin Zaid, bermula dari awal surah hingga firman Allah s.w.t. ayat 41, adalah Makkiyyah. Manakala bermula daripada ayat ini sehinggalah akhir surah adalah Madaniyyah. Ini berdasarkan kepada riwayat dari Ibn Abbas dan Ibn al-Zubir.

Sebab Penamaannya

Menurut ulama-ulama tafsir, dinamakan surah al-Nahl kerana di dalamnya terkandung dua ayat yang membicarakan tentang lebah dan perihalnya tidak disebut di dalam surah lain. Firman Allah s.w.t.:

وَأَوْحَىٰ رَبُّكَ إِلَى النَّحْلِ أَنِ اتَّخِذِي مِنَ الْجِبَالِ بُيُوتًا وَمِنَ الشَّجَرِ وَمِمَّا يَعْرِشُونَ ۖ ٦٨ ثُمَّ كُلِي مِن كُلِّ
الْتَمَرَاتِ فَاسْلُكِي سُبُلَ رَبِّكِ ذُلَالًا يَخْرُجُ مِنْ بُطُونِهَا شَرَابٌ مُّخْتَلِفٌ أَلْوَانُهُ فِيهِ شِفَاءٌ لِلنَّاسِ ۚ إِنَّ فِي ذَلِكَ
لَآيَةً لِّقَوْمٍ يَتَفَكَّرُونَ ٦٩

Dan Tuhanmu memberi ilham kepada lebah: "Hendaklah engkau membuat sarangmu di gunung-ganang dan di pokok-pokok kayu, dan juga di bangunan-bangunan yang didirikan oleh manusia. Kemudian makanlah dari segala jenis bunga-bunga dan buah-buahan (yang engkau sukai), serta turutlah jalan-jalan peraturan Tuhanmu yang diilhamkan dan dimudahkannya kepadamu". (dengan itu) akan keluarlah dari dalam badannya minuman (madu) yang berlainan warnanya, yang mengandungi penawar bagi manusia (dari berbagai-bagai penyakit). Sesungguhnya pada yang demikian itu, ada tanda (yang membuktikan kemurahan Allah) bagi orang-orang yang mahu berfikir.

(Al-Nahl: 68-69)

Di dalam ayat-ayat ini Allah s.w.t. telah menjelaskan bagaimana Ia telah mengilhamkan kepada sejenis serangga yang amat kecil bernama lebah supaya menyedut bunga-bunga dan buah-buah. Kemudian terhasil daripadanya madu yang menjadi penawar kepada manusia. Kisah yang amat menakjubkan dan menarik ini bertujuan supaya manusia berfikir dan memerhatikan ciptaan Allah s.w.t. yang amat hebat. Pemerhatian kepada ciptaan lebah dan keberhasilan madu darinya akan membawa kepada hakikat kewujudan, kehebatan dan keagungan penciptaNya, iaitu Allah s.w.t. Diriwayatkan daripada Qatadah menjelaskan bahawa surah al-Nahl ini dinamakan juga surah al-Nia'm (nikmat-nikmat). Menurut Ibn 'Atiyyah, ia adalah kerana di dalamnya Allah s.w.t. menyebut pelbagai nikmat kepada hamba-hambaNya (Muhammad Tohir, 1984).

Munasabah Surah Al-Nahl Dengan Surah Sebelumnya

Jika dilihat pada akhir surah al-Hijr, ia mempunyai keterikatan yang amat erat dengan awal surah ini. Firman Allah s.w.t. pada akhir surah al-Hijr:

فَوَرَبِّكَ لَنَسْتَأْتِيهِمْ أَجْمَعِينَ ٩٢

Demi Tuhanmu! Kami akan menyoal mereka (yang kafir itu) semuanya (pada hari kiamat kelak)

(Al-Hijr: 92)

Ayat ini menunjukkan kepada kepastian bahawa manusia akan dihimpun dan disoal atas apa yang mereka telah lakukan di atas dunia. Begitu juga pada firman Allah s.w.t.:

وَأَعْبُدْ رَبَّكَ حَتَّىٰ يَأْتِيَكَ الْيَقِينُ ٩٩

Dan sembahlah Tuhanmu, sehingga datang kepadamu (perkara yang tetap) yakin.

(Al-Hijr: 99)

Ayat ini mengingatkan manusia bahawa mereka akan mati dan bertemu dengan Allah s.w.t. Cuma menurut Dr. Wahbah al-Zuhaily, di dalam surah al-Hijr Allah s.w.t. mendatangkan ayat-ayat tersebut dengan lafaz *mudhari* dan pada surah ini dengan lafaz *madhi*. Penggunaan lafaz *madhi* ini bertujuan untuk menunjukkan bahawa peristiwa kiamat itu benar-benar akan berlaku dan masa berlakunya adalah amat hampir sekali (Wahbah al-Zuhaily, 1998).

Isi Kandungan Surah Al-Nahl Secara Umum

Secara umumnya, surah ini membicarakan tentang usul tauhid atau akidah, iaitu mengesakan Allah s.w.t. dalam segala perkara, hari kebangkitan dan manusia akan dikumpulkan di Padang Makhsyar. Di awal-awal surah, Allah s.w.t. telah memulakan dengan satu khabar kepastian bahawa akan berlakunya hari kiamat dalam masa yang terdekat. Allah s.w.t. telah menggunakan lafaz *madhi* sebagai tanda kepastian akan berlakunya hari tersebut. Kemudian Ia nyatakan perihal wahyu yang diingkari dan dinafikan oleh golongan Musyrikin.

Setelah itu, surah ini mendatangkan dalil-dalil kekuasaan Allah s.w.t. di alam ini dengan menjelaskan ciptaan-ciptaanNya seperti langit dan bumi serta apa yang terkandung di dalam kedua-duanya seperti bintang-bintang, gunung-ganang, lautan, sungai, tumbuh-tumbuhan dan tanam tanaman, haiwan, kejadian manusia daripada air mani serta manfaat yang diperolehi daripada ciptaan-ciptaan tersebut. Surah ini juga menjelaskan pelbagai nikmat Allah s.w.t. kepada manusia, namun mereka kufur dan tidak bersyukur dengan nikmat yang dianugerahkan tersebut. Maka disediakan untuk mereka neraka jahanam yang akan menjadi tempat penginapan mereka selama-lamanya. Bagi orang yang bersyukur dan bertaqwa, disediakan syurga *'Adn*. Selain nikmat-nikmat tersebut, Allah s.w.t. utuskan rasul kepada setiap umat supaya mereka mengajak manusia kepada mengabdikan diri kepada Allah s.w.t. dan menjauhi taghut.

Kemudian diingatkan kepada rasul-rasul bahawa di hari kiamat nanti mereka akan dipersaksikan atas apa yang mereka sampaikan kepada kaum mereka di atas dunia dahulu. Manakala orang kafir tidak dibenarkan berkata-kata pada hari tersebut dan Allah s.w.t. enggan menerima apa sahaja alasan yang diberikan atas kekufuran mereka.

Setelah itu diperintahkan supaya memenuhi atau menunaikan janji yang telah dibuat dan haram mengkhianati janji tersebut. Dan ditegah juga bersumpah dalam janji tersebut dengan tujuan untuk menipu dan sebagainya.

Allah s.w.t memerintahkan juga supaya dibacakan *isti'azah* apabila hendak membaca al-Quran. Dan dijelaskan juga ketidakmampuan syaitan untuk menguasai orang yang beriman dan bertaqwa kepada tuhanNya, dan penguasaan tersebut hanya kepada orang-orang musyrikin. Selain itu dijelaskan sesungguhnya al-Quran ini diturunkan oleh *Roh al-Qudus* ke dalam hati Nabi Muhammad s.a.w. Ia merupakan kalam Allah s.w.t., bukannya kalam manusia yang berbangsa Arab atau *'ajam*.

Di akhir surah, dinyatakan tentang haiwan yang diharamkan oleh Allah s.w.t. dan menegah ulama-ulama daripada menghalal atau mengharamkan sesuatu tanpa bersandarkan kepada dalil.

Kemudian ditutup surah ini dengan memuji Nabi Ibrahim a.s. yang tetap teguh berpegang kepada tauhid yang sebenar. Justeru itu Allah s.w.t. memerintahkan baginda s.a.w. mengikut millah Nabi Ibrahim a.s. Allah s.w.t. juga memerintahkan supaya berdakwah kepada agamaNya dengan uslub yang berhikmah dan nasihat yang baik serta dalam masa yang sama bersabar dengan musibah dan kesedihan yang menimpa serta bergantung kepada pertolongan Allah s.w.t (Wahbah alZuhaily, 1998 dan Muhammad Ali, 1997).

4.0 PERANAN AKAL DALAM MENGENALI ALLAH S.W.T.

Islam telah menjadikan akal sebagai tempat taklif (bebanan syarak). Lantaran itu Allah s.w.t. telah mentaklifkan seseorang untuk melakukan ibadah apabila ia sempurna akalnya. Menurut Ahmad Izzuddin, asas bagi akidah Islam dan seluruh hukum-hukum syarak ialah kitab Allah s.w.t. dan sunnah Rasulullah s.a.w. Akidah dan hukum-hukum ini pula disokong oleh akal dan disabitkan dengan penelitian yang tepat. Oleh itu Allah s.w.t. telah memuliakan akal dengan menjadikannya pusat khitab (arahan sama ada arahan berbentuk suruhan atau larangan) dan taklif Allah s.w.t. telah menggalakkan manusia menggunakan akal supaya meneliti, mengkaji dan memikirkan tentang tanda-tanda kekuasaan Allah s.w.t. sama ada yang boleh dilihat atau yang boleh dibaca (Izzuddin, 2003).

Ulama-ulama kalam juga telah menggariskan satu kaedah hukum yang dikenali sebagai hukum akal untuk mengenali Allah s.w.t. Hukum akal telah didefinisikan oleh mereka sebagai ketetapan hukum yang ditetapkan oleh akal untuk mensabitkan atau menafikan hukum bagi sesuatu, sama ada menghukumkan ada atau menghukumkan tiada seperti menghukumkan wajib adanya Allah s.w.t. dan menghukumkan pula mustahil tiadanya Allah s.w.t. (Engku Ali, 2011). Mereka telah membahagikan hokum akal ini kepada tiga, iaitu:

- i. **Wajib:** barang yang tidak diterima akal akan tiadanya, malahan ianya tetap ada atau wajib ada. Contohnya seperti wajib adanya Allah s.w.t., tuhan yang menciptakan alam ini.
- ii. **Mustahil:** barang yang tidak diterima pada akal akan adanya, malahan ianya tetap tiada atau mustahil ada. Contohnya mustahil tiada yang mencipta alam ini, kerana ia baharu sahaja adanya. Oleh kerana itu, sudah tentu alam ini ada yang menjadikannya sehingga ia wujud sekarang ini.

- iii. Harus: Barang yang diterima pada akal akal adanya dan tiadanya. Contohnya seperti adanya atau tiadanya perkara yang mungkin (sesuatu yang boleh jadi ada atau boleh jadi tiada iaitu segala makhluk). Oleh itu, adanya atau tiadanya makhluk itu adalah suatu yang harus jua (Ibrahim, 2015 dan Muhammad, 2009).

Daripada perbahasan di atas, jelas menunjukkan bahawa akal memainkan peranan yang amat penting dalam mengenal Allah s.w.t. Bahkan dengan akal yang waras dan normal manusia mampu mencapai *maqam* semulia malaikat.

5.0 SARANAN MENGGUNAKAN AKAL DI DALAM SURAH AL-NAHL

Allah s.w.t. telah menjadikan al-Quran sebagai panduan kepada manusia, khususnya dalam mengenali penciptanya. Pelbagai metode dan cara yang digunakan olehNya agar manusia sampai kepada tahap mengenaliNya secara *jazam* dan *thabat* serta diimaninya di dalam hati tanpa *zhon*, *syak* dan *waham*.

Kajian di dalam surah al-Nahl mendapati bahawa Allah s.w.t. telah menggunakan dua metode yang amat menarik agar manusia dapat mengaplikasikan akal mereka ke arah mengenali Allah s.w.t. Metode pertama ialah menerusi menyebut ciptaan-ciptaanNya dan fungsi-fungsi serta manfaatnya kepada manusia. Metode kedua ialah menerusi perumpamaan. Manakala metode ketiga ialah melalui perbandingan. Ketiga-tiga metode ini jelas memberikan isyarat kepada manusia agar menggunakan akal mereka untuk memikirkan segala apa yang telah dinyatakan oleh Allah s.w.t.

Di antara ayat-ayat yang menggunakan metode pertama, iaitu menyebut perihal makhluk-makhluk ciptaannya, fungsi-fungsi dan manfaat-manfaatnya ialah:

Bil.	Ayat	Isi kandungan
1.	3. Ia menciptakan langit dan bumi dengan cara yang sungguh layak dan berhikmat; Maha Tinggilah ia dari perbuatan syirik yang mereka lakukan.	Penciptaan langit dan bumi.
2.	4. Ia menciptakan manusia dari air benih, (setelah sempurna kejadiannya), tiba-tiba menjadilah ia seorang pembantah yang terang jelas bantahannya.	Penciptaan manusia.
3.	5. Dan binatang-binatang ternak itu, ia juga menciptakannya untuk kamu; terdapat padanya benda-benda yang memanasakan tubuh dari sejuk dan beberapa faedah yang lain; dan daripadanya juga kamu makan. 6. Dan bagi kamu pada binatang-binatang ternak itu, keindahan (yang	Penciptaan binatang-binatang ternakan dan manfaat-manfaatnya kepada manusia

	<p>menarik hati) ketika kamu membawanya balik untuk berihat (pada waktu petang), dan ketika kamu membawanya keluar (pada waktu pagi).</p> <p>7. Dan binatang-binatang itu pula membawa barang-barang kamu ke mana-mana negeri yang kamu tidak dapat sampai kepadanya melainkan Dengan menanggung susah payah. Sesungguhnya Tuhan kamu amat melimpah belas kasihan dan rahmatNya.</p>	
4.	<p>8. Dan (Allah menjadikan) kuda dan baghal serta keldai untuk kamu menunggangnya, dan untuk menjadi perhiasan; dan ia menjadikan apa yang kamu tidak mengetahuinya.</p>	<p>Penciptaan beberapa jenis binatang lain dan manfaat-manfaatnya.</p>
5.	<p>10. Dia lah yang menurunkan hujan dari langit; sebahagian daripadanya untuk minuman kamu dan sebahagian lagi menyebabkan tumbuhnya pokok-pokok (tumbuh-tumbuhan) untuk kamu melepaskan binatang-binatang ternak: makan padanya.</p> <p>11. Ia juga menumbuhkan bagi kamu dengan sebab hujan itu tanaman-tanaman dan pokok-pokok zaitun dan tamar (kurma) serta anggur; dan juga dari segala jenis buah-buahan. Sesungguhnya yang demikian mengandungi satu tanda (yang membuktikan kekuasaan Allah) bagi kaum yang mahu berfikir.</p>	<p>Penciptaan hujan dan manfaatnya.</p>
6.	<p>12. Dan ia memudahkan bagi kamu malam dan siang, dan matahari serta bulan; dan bintang-bintang dimudahkan dengan perintahNya untuk keperluan-keperluan kamu. Sesungguhnya yang demikian itu mengandungi tanda-tanda (yang membuktikan kebijaksanaan Allah) bagi kaum yang mahu memahaminya.</p>	<p>Penciptaan malam dan siang, matahari, bulan dan bintang-bintang.</p>
7.	<p>13. Dan apa-apa jua yang dijadikan untuk kamu di bumi yang berlainan jenisnya (dimudahkan juga untuk</p>	<p>Penciptaan pelbagai perkara-disebut secara umum.</p>

	kegunaan kamu). Sesungguhnya yang demikian itu mengandung satu tanda (yang membuktikan kemurahan Allah) bagi kaum yang mahu mengingati nikmat Allah itu.	
8.	14. Dan Dia lah yang memudahkan laut, supaya kamu dapat makan daripadanya daging yang lembut hidup-hidup, dan dapat pula mengeluarkan daripadanya benda-benda perhiasan untuk kamu memakainya dan (selain itu) engkau melihat pula kapal-kapal belayar padanya; dan lagi supaya kamu dapat mencari rezeki dari limpah kurniaNya; dan supaya kamu bersyukur.	Penciptaan laut dan manfaatnya.
9.	15. Dan ia mengadakan di bumi gunung-ganang yang menetapnya supaya ia tidak menghayun-hayunkan kamu; dan ia mengadakan sungai-sungai serta jalan-jalan lalu lalang, supaya kamu dapat sampai ke matlamat yang kamu tuju.	Penciptaan gunung-ganang, sungai dan jalan dan manfaatnya.
10.	16. Dan (ia mengadakan) tanda-tanda panduan jalan, dan dengan bintang-bintang (pada waktu malam) mereka dapat mengetahui arah yang hendak dituju.	Penciptaan bintang dan manfaatnya.
11.	36. Dan sesungguhnya Kami telah mengutus Dalam kalangan tiap-tiap umat seorang rasul (dengan memerintahkannya menyeru mereka): "Hendaklah kamu menyembah Allah dan jauhilah taghut". Maka di antara mereka (yang menerima seruan rasul itu), ada yang diberi hidayah petunjuk oleh Allah dan ada pula yang berhak ditimpa kesesatan. oleh itu mengembaralah kamu di bumi, kemudian lihatlah bagaimana buruknya kesudahan umat-umat yang mendustakan rasul-rasulNya.	Perintah mengembara untuk melihat kesan umat-umat yang mendustakan rasul-rasul yang diutuskan.
12.	48. Tidakkah mereka melihat dan memikirkan segala yang telah dijadikan oleh Allah, yang beredar	Penciptaan bayang-bayang dan rahsianya.

	(berpindah-randah) bayang-bayangnya ke kanan dan ke kiri (pada pagi dan petang), dengan keadaan tunduk menurut peraturan dan kehendak Allah, sedang mereka merendahkan diri?	
13.	65. Dan Allah menurunkan hujan dari langit, lalu ia menghidupkan dengan air hujan itu akan bumi sesudah matinya; Sesungguhnya pada yang demikian itu terdapat satu tanda (yang membuktikan kebijaksanaan Allah) bagi kaum yang mendengar (peringatan ini dan memahaminya).	Penciptaan hujan dan manfaatnya.
14.	66. Dan sesungguhnya pada binatang-binatang ternak itu, kamu beroleh pelajaran yang mendatangkan iktibar. Kami beri minum kepada kamu daripada apa yang terbit dari dalam perutnya, yang lahir dari antara hampas makanan dengan darah; (Iaitu) susu yang bersih, yang mudah diminum, lagi sedap rasanya bagi orang-orang yang meminumnya.	Penciptaan binatang-binatang ternakan dan manfaatnya.
15.	67. Dan dari buah tamar (kurma) dan anggur kamu jadikan daripadanya minuman haram dan makanan serta minuman yang halal; Sesungguhnya pada yang demikian itu terdapat satu tanda (yang membuktikan kekuasaan Allah) bagi orang-orang yang mahu menggunakan akalny.	Penciptaan kurma dan anggur serta faedahnya.
16.	68. Dan Tuhanmu memberi ilham kepada lebah: "Hendaklah engkau membuat sarangmu di gunung-ganang dan di pokok-pokok kayu, dan juga di bangunan-bangunan yang didirikan oleh manusia. 69. Kemudian makanlah dari segala jenis bunga-bunga dan buah-buahan (yang engkau sukai), serta turutlah jalan-jalan peraturan Tuhanmu yang diilhamkan dan dimudahkannya kepadamu". (dengan itu) akan keluarlah dari dalam badannya minuman (madu) yang berlainan	Penciptaan lebah dan manfaatnya.

	warnanya, yang mengandung penawar bagi manusia (dari berbagai-bagai penyakit). Sesungguhnya pada yang demikian itu, ada tanda (yang membuktikan kemurahan Allah) bagi orang-orang yang mahu berfikir.	
17.	<p>70. Dan Allah yang menciptakan kamu (dari tiada kepada ada); kemudian ia matinya), dan ada pula di antara kamu yang dikembalikannya kepada peringkat umur yang lemah (peringkat tua kebudak-budakan), sehingga menjadilah ia tidak ingat akan sesuatu yang telah diketahuinya; Sesungguhnya Allah Maha Mengetahui, lagi Maha Kuasa.</p> <p>71. Dan Allah telah melebihkan sebahagian dari kamu atas sebahagian yang lain pada rezeki yang dikurniakanNya; Dalam pada itu, orang-orang yang diberi kelebihan itu tidak mahu memberikan sebahagian dari kelebihan hartanya kepada hamba-hamba mereka, supaya orang-orang itu dapat sama mempunyai harta. Maka mengapa mereka tergamak mengingkari nikmat Allah itu dengan perbuatan syirik?</p> <p>72. Dan Allah menjadikan bagi kamu dari diri kamu sendiri pasangan-pasangan (isteri), dan dijadikan bagi kamu dari pasangan kamu: anak-anak dan cucu-cicit, serta dikurniakan kepada kamu dari benda yang baik lagi halal; maka patutkah mereka (yang ingkar itu) percaya kepada perkara yang salah (penyembahan berhala), dan mereka kufur pula akan nikmat Allah?</p>	Penciptaan manusia, peringkat-peringkat kehidupan mereka, nikmat dan rezeki.
18.	78. Dan Allah mengeluarkan kamu dari perut ibu kamu dengan keadaan tidak mengetahui sesuatupun; dan Dia mengurniakan kepada kamu pendengaran dan penglihatan serta hati akal fikiran); supaya kamu bersyukur.	Nikmat-nikmat kepada manusia

19.	79. Tidakkah mereka memperhatikan burung-burung yang dimudahkan terbang melayang-layang di angkasa? tiada yang menahan mereka (dari jatuh) melainkan Allah; Sesungguhnya pada yang demikian itu, ada tanda-tanda (yang membuktikan kekuasaan Allah) bagi kaum yang beriman.	Penciptaan burung
20.	80. Dan Allah menjadikan bagi kamu rumah-rumah (yang kamu dirikan itu) tempat tinggal; dan ia menjadikan bagi kamu dari kulit binatang-binatang ternak: khemah-khemah (tempat berteduh), yang kamu mendapatinya ringan (di bawa ke mana-mana) semasa kamu merantau dan semasa kamu berhenti; dan (ia juga menjadikan bagi kamu) dari berjenis-jenis bulu binatang-binatang ternak itu, berbagai barang perkakas rumah dan perhiasan, (untuk kamu menggunakannya) hingga ke suatu masa. 81. Dan Allah menjadikan bagi kamu sebahagian dari yang diciptakanNya: benda-benda untuk berteduh, dan ia menjadikan bagi kamu sebahagian dari gunung-ganang tempat-tempat berlindung; dan ia juga menjadikan bagi kamu pakaian-pakaian yang memelihara kamu dari panas dan sejuk, juga pakaian-pakaian yang memelihara kamu semasa berjuang. Demikianlah, ia menyempurnakan nikmatNya kepada kamu, supaya kamu berserah diri kepadanya dan mematuhi perintahNya.	Penciptaan tempat tinggal dan berteduh, pakaian, serta perabot rumah.
21.	115. Sesungguhnya Allah hanya mengharamkan kepada kamu memakan bangkai, dan darah, dan daging babi, dan binatang yang disembelih tidak kerana Allah maka sesiapa terpaksa (memakannya kerana darurat) sedang ia tidak menginginya dan tidak melampaui	Pengharaman beberapa jenis makanan.

	batas (pada kadar benda yang dimakan itu, maka tidaklah ia berdosa), sesungguhnya Allah Maha Pengampun, lagi Maha Mengasihani.	
--	--	--

Metode kedua ialah menerusi perumpamaan:

Bil.	Ayat	Isi kandungan
1.	75. Allah memberikan satu misal perbandingan: seorang hamba abdi yang menjadi milik orang, yang tidak berkuasa melakukan dengan bebasnya sesuatupun; dan seorang lagi (yang merdeka) yang Kami kurniakan kepadanya pemberian yang baik (harta kekayaan) dari kami, maka Dia pun membelanjakan hartanya dengan bebasnya, sama ada secara bersembunyi atau terbuka, Adakah kedua orang itu sama? Segala puji tertentu bagi Allah (dan Allah jualah yang berhak disembah), tetapi kebanyakan mereka (yang musyrik) tidak mengetahui (hakikat Tauhid itu).	Perumpamaan seorang hamba dengan seorang yang merdeka – berhala yang disembah dengan Allah s.w.t.
2.	76. Dan Allah memberikan satu misal perbandingan lagi: dua orang lelaki, salah seorangnya kelu pekak dari semulajadinya, tidak dapat menyatakan apa yang difikirkannya dan tidak dapat mendengar apa yang dikatakan kepadanya; dan ia pula menjadi beban kepada orang yang menjaganya; ke mana sahaja ia diarahkan pergi oleh penjaganya, tak dapatlah Dia membawa sesuatu yang berfaedah; Adakah Dia (yang demikian sifatnya) sama seperti orang (yang boleh berkata-kata serta dapat) menyuruh orang ramai melakukan keadilan, dan ia sendiri pula berada di atas jalan yang lurus (jalan yang benar)?	Perumpamaan orang yang bisu dan pekak dengan orang yang sempurna sifat-sifatnya – berhala yang disembah dengan Allah s.w.t.

Dan yang terakhir adalah metode perbandingan:

Bil.	Ayat	Isi kandungan
1.	17. Kalau sudah demikian, Adakah	Perbandingan antara Allah s.w.t. yang

	Allah yang menciptakan semuanya itu sama seperti makhluk-makhluk yang tidak menciptakan sesuatu? Maka patutkah kamu lalai sehingga kamu tidak mahu beringat serta memikirkannya?	berkuasa mencipta dengan makhluk-makhluk lain yang tidak mampu mencipta.
2.	20. Dan makhluk-makhluk yang mereka sembah selain dari Allah itu tidak dapat menciptakan sesuatupun, bahkan merekalah yang diciptakan.	Perbandingan makhluk yang disembah, tidak dapat mencipta, sebaliknya mereka yang dicipta.

Daripada kajian di atas menunjukkan bahawa gesaan menggunakan akal dalam mengenali Allah s.w.t. adalah sesuatu yang penting dan perlu dititikberatkan. Bahkan memerhatikan segala makhluk Allah s.w.t. mampu membawa manusia kepada mengenal Allah s.w.t. dan seterusnya beriman kepadaNya serta mengesakanNya dalam segala upacara ibadah dan *isti'ana*h. Firman Allah s.w.t.:

{5} إِيَّاكَ نَعْبُدُ وَإِيَّاكَ نَسْتَعِينُ

“Hanya kepada Engkau kami sembah dan hanya kepada Engkau kami mohon pertolongan.”

(al-Fatihah (1): 5)

6.0 Kesimpulan

Islam adalah satu-satunya agama yang menghormati dan memuliakan kedudukan akal. Ia dianggap sebagai medium yang mampu mengetahui hakikat sesuatu perkara, khususnya hakikat kewujudan Allah s.w.t., kekuasaanNya dan wahdaniyyahNya. Islam juga tidak membenarkan penganut-penganutnya bertaqlid secara semborono tanpa mengetahui dalil dan bukti. Jesteru itu ia menyarankan kepada penganut-penganutnya agar sentiasa berfikir, merenung dan mengkaji. Bahkan ia mencela dan menghina manusia yang mensia-siakan akal fikiran yang dianugerahkan oleh Allah s.w.t.

Namun demikian, perlu diingatkan bahawa akal manusia ini mempunyai batasan dan hadnya. Ia seharusnya bergantung dan bersandarkan kepada al-Quran dan al-Sunnah yang menjadi rujukan utama. Kegagalan mengambil kedua-dua sumber ini sebagai asas dan panduan dalam berfikir akan membawa kepada penyimpangan dan penyelewengan dari jalan ahli sunnah wal jamaah yang sebenar.

7.0 Rujukan

- Abdul Latif Muda dan Rosmawati binti Ali. (1997). Pengantar Ilmu Mantik. Kuala Lumpur: Ilham Abati Enterprise.
- Ahmah Izzudin al-Bayanuni. (2003). Petunjuk Akidah: Ahli Sunnah wal Jamaah. J.1.
- Engku Ali bin Engku Endut. (2011). Fiqh al-Aqidah. Pattani: Bin Halabi Press.
- Jamaah Min Kibar al-Lughawiyin al-‘Arab. Al-Mu’jam al-‘Arabi al-Asasi. Al-Munazommah al-‘Arabiyyah lil Tarbiyyah wa al-Thaqofah wa al-Ulum.
- Muhammad Ali Sabuni. (1997). Sofwah al-Tafasir. Kaherah: Dar al-Sabuni. J. 2.
- Muhammad Tohir bin ‘Asyhur. (1984). Tafsir al-Tahrir wa al-Tanwir. Tunisia: Dar al-Tunis lil Nashr. J. 14.
- Muhammad bin Mukram. (1997). Lisan al-‘Arab. Beirut: Dar Sader. J. 4.
- Noresah Baharom. (2007). Kamus Dewan (Edisi Keempat). Selangor: Dawama Sdn. Bhd.
- Said Hawwa. (1997). Tarbiyatuna al-Ruhiyyah. Kaherah: Dar as-Salam.
- Wahbah al-Zuhaily. (1998). Al-Tafsir al-Munir fi al-Aqidah wa al-Syariah wa al-Manhaj. Damsyik: Dar al-Fikr. J. 13-14.